



**Ord la nebla han ins udiu ina vusch:
Quei ei miu Fegl carezau (Mc 9,7).**

Plaid pastoral per la secunda dumengia da
Cureisma 2024

Joseph Maria Bonnemain,
uestg da Cuera

Avis per ils texts liturgics :

Lecziuns da la secunda dumengia da Cureisma, onn B

1. Lecziun: Gen 22,1-2.9a.10-13.15-18

2. Lecziun: Ro 8,31b-34

Evangelii: Mc 9,2-10

Quei plaid pastoral sa vegnir prelegius ni miraus sco messadi da video en tuts survetschs divins la secunda dumengia da Cureisma, ils 25 da fevrer 2024.

Per mintga dumengia dil temps da Cureisma vegn tarmess tier ad uras a mintga pleiv in plaid pastoral corrispudent cun il messadi da video.

Ils messadis pastorals vegnan mintagmai gliendisdis suenter mintga dumengia da Cureisma dai liber.

Caras soras, cars frars

Oz, la secunda dumengia da Cureisma less jeu all'entschatta dar peisa als plaids da sogn Paul alla cuminonza cristiana da Ruma: "Sche Dieus ei per nus, tgi vul lu esser encunter nus? El che ha buca schanegiau siu agen Fegl, mobein dau vi quel per nus tuts, co duess el buca regalar scadina favur a nus cun el ensemen?"

Sche nus sedumandein tgi che Paulus manegia cun "nus", duessan nus vegnir alla perschuasiun che l'entira famiglia humana, tuts carstgauns da tuts temps ein manegiai.

Dieus ei buc il Dieus dad ina elita, dad ina gruppa da carstgauns ch'ei serrada ed egoistica. Jesus Cristus ei vegnius el mund – tier nus – per che tuts possien vegnir spindrai.

Nies mund ha in futur – era oz. Il mund existent ei il mund che Dieus careza. El ei en nies miez: el ei igl Immanuel, il Diu cun nus – tochen alla fin dils temps.

Jesus ha buca vuliu restar cun Pieder, Giachen e Gion sil cuolm dalla tranfiguraziun. Els vessen lu saviu manegiar che Dieus preferessi in mund transfigurau, pur e perfetg; in mund, ina carstgaunadad che ha buca da basegns d'in spindrament. Il Segner ha vuliu descender dil cuolm, per che tuts possien endriescher che la vera tranfiguraziun

divina schabegia entras siu seunir cul carstgaun, cul mund e cun tut quei che ha da basegns d'in spindrament. Entras Jesus Cristus di Dieus a mintga carstgaun: "Ti eis mia feglia carezada, miu feagl carezau". Dieus envida nus da tedlar sin mintga carstgaun, da scuvierer en mintga carstgaun enzatgei custeivel, da veser e carezar mintga carstgaun sco affon da Diu.

La conversiun necessaria duront il temps da Cureisma duei era consisten en quei che nus descendin dall'aultezia dallas teorias ellas bassezias dalla realitad e quei cun la perschasiun che la grondezia e tutpussonza da Diu sa mo vegnir sentida el bass e fleivel. Gest leu spetga Dieus nus!

Unius ell'oraziun culs megliers auguris salidel jeu Vus cordialmein.

+ *Joseph Maria*

Joseph Maria Bonnemain
uestg da Cuera